

OSVRT NA RAD GEODETSKOG ZAVODA U SARAJEVU

Geodetski zavod u Sarajevu je radna organizacija koja obavlja poslove od posebnog društvenog interesa.

Osnovna djelatnost Zavoda je:

- premjer i izrada katastra zemljišta,
- izrada i održavanje katastra komunalnih uređaja,
- inženjerska geodezija.

Geodetski zavod je jedinstvena samoupravna radna organizacija bez osnovnih organizacija udruženog rada u svom sastavu. Unutrašnju organizaciju Zavoda čini 10 radnih jedinica, od toga osam u Sarajevu, jedna u Banja Luci i jedna u Mostaru.

Ukupna realizacija Geodetskog zavoda u 1977. godini iznosila je 52,000.000.- dinara, dok se u 1978. godini planira 63,000.000.- dinara.

Preteča sadašnjeg Geodetskog zavoda je operativa od oko 30-tak geodetskih stručnjaka pri Ministarstvu gradjevina koja je krajem 1948. godine prerasla u preduzeće "GEORAD" sa 50 - 60 geodetskih stručnjaka, da bi 31.03.1952. godine ista prestala sa radom a formirana je ponovo operativa pri Geodetskoj upravi, sa 140 radnika /117 geodetskih stručnjaka i 21 službenik/. Konačno 1.01.1962. godine Izvršno vijeće Skupštine SR Bosne i Hercegovine, kao osnivač, osniva Geodetski zavod sa 203 radnika /168 geodetskih stručnjaka i 35 službenika/.

Danas Geodetski zavod ima 279 radnika od toga oko 200 radnika u radnim jedinicama u Sarajevu, 40 radnika u Banja Luci i 40 radnika u Mostaru, odnosno ukupno 240 geodetskih stručnjaka i 39 ostalog profila.

Perspektiva i dalja egzistencija Zavoda zacrtana je u srednjoročnom planu razvoja Zavoda i zavisna je od rješavanja slijedećih bitnih elemenata:

kompletiranje i proširenje proizvodnih kapaciteta kao preduslova za obavljanje osnovne djelatnosti odnosno poslova od posebnog društvenog interesa, njihovog razvoja i unapređenja.

Pod kompletiranjem proizvodnje prije svega obuhvaćene su: reprodukcija, automatska obrada podataka i izrada fotomaterijala. Što se tiče reprodukcije treba istaći da Zavod ima organizovanu radnu jedinicu za kartografiju i reprodukciju, međutim, ista nije potpuno kompleti-

rana dijelom zbog nedostatka sredstava a dijelom zbog restrikcije uvoza neophodne opreme. Uporedo sa kompletiranjem reprodukcije kompletirat će se fotolaboratorija za što postoje objektivni preduslovi /prostor, dio sredstava za nabavku opreme i razradjen tehnološki proces/. Pitanje automatske obrade podataka, kao dijela proizvodnog procesa vezano je za izgradnju poslovne zgrade Zavoda.

U pogledu proširenja proizvodnih kapaciteta treba istaći da se uglavnom realizuje zacrtana proizvodnja za ovu godinu, u iznosu 200.000 ha, a do 1980. godine ta proizvodnja se planira na 260.000 ha.

- rješavanje poslovnog prostora kao preduslova za funkcionalno, ekonomično i blagovremeno izvršenje postavljenih zadataka Zavoda kao cjeline.

Kada se ističe ovaj problem misli se na poslovni prostor u Sarajevu, Banja Luci i Mostaru.

U toku ove godine pitanje poslovnog prostora RJ Mostar definitivno će biti riješeno, dok je rješavanje toga problema u Banja Luci vezano za Skupštinu opštine Banja Luka i prema postignutim dogovorima takodje će biti riješeno u 1979. godini.

Pitanje poslovnog prostora u Sarajevu rješavat će se u toku 1978./1979. godine, a objektivno se planira definitivni završetak koncem 1980. godine.

- treći, ne manje važan, elemenat je ljudski faktor tj. poboljšanje kadrovske strukture radnika Zavoda i društveni standard radnika. Po svojoj prirodi, geodetski poslovi su specifični, zbog odlaska na teren i prikupljanja podataka na terenu, a traju od šest do sedam mjeseci. Ovakav posao zahtijeva velike fizičke napore, mlade, zdrave i stručne radnike. Medjutim, pitanje adekvatnog nagrađivanja ove kategorije radnika nije potpuno riješeno.

Povećanjem produktivnosti rada i većim stepenom korištenja kapaciteta planirano je da u narednom periodu lični dohoci rastu nešto većom stopom rasta, kako bi se naprijed istaknuti problem riješio ili bar ublažio.

Društveni standard radnika, a posebno veoma teška stambena situacija radnika Zavoda /od 270 zaposlenih oko 100 je neriješenih stambenih potreba/ pored naprijed istaknutog pitanja nagrađivanja, ubrzava odliv stručnog obučenog kadra, tako da se Zavod, konstantno suočen sa ovim problemima, pojavljuje kao škola za praktičnu obuku stručnjaka a što otežava brži razvoj kompletnog Zavoda.

Iznoseći bitne elemente usvojenog srednjoročnog plana razvoja Zavoda, želimo da širu stručnu javnost upoznamo sa određenim naporima sa kojima se ovaj Zavod suočava i kao čvrstu želju radnika Zavoda

na otklanjanju gore iznesenih problema i realizaciji zacrtanog plana, koje ipak, iz objektivnih razloga, ne mogu riješiti bez odgovarajuće pomoći nadležnih organa, koje vjerujemo neće izostati.

TOMISLAV OPAČAK, geod. inž.

ŠESNAEST GODINA RADA GEODETSKOG SERVISA U BANJA LUCI

6. april 1962. godine je dan rođenja Geodetskog servisa Banja Luka. Toga dana Narodni odbor sreza Banja Luka na sjednicama Sreskog Vijeća i Vijeća proizvođača donio je odluku da se formira Geodetski servis Banja Luka kao samostalna ustanova.

Od toga datuma do danas predjen je put dug šesnaest godina. Nije bio ni malo lak, to je bio put pun samopregornog rada, odricanja učenja i razvoja, put afirmacije na kome nisu cvjetale ruže, jer se moralo hvatati u koštac sa mnogim nedaćama, suzbijati nevjerice, izbjegavati raznorazne zamke, uklopiti se u tokove privrede i izboriti sebi dostojno mjesto pod suncem. Na tome putu bilo je i padova i uspona, ali svaki pad je kolektivu davao nove impulse u borbi za još veći napredak, usponi nisu uspavljivali nego su bili podstrek da se ide dalje, da se još više jača i razvija. Vremena za slavlje nije bilo, novi zadaci su pristizali. Svaki novi zadatak značio je ujedno i priznanje za uspješno obavljanje ranijih poslova, a ugled se vrlo teško sticao i nismo smjeli dozvoliti da ga okrnjimo.

Početak, kao i svaki drugi, bio je težak. Sa četiri čovjeka, dotacijom Sreza od 600.000 starih dinara i dva posudjena instrumenta. Prva godina poslovanja završena je sa ukupnim prihodom od 4,717.000 starih dinara i ostatkom dohotka u fondovima od 1,065.000 starih dinara. Tada je kupljen prvi instrumenat.

Na kraju pete godine postojanja stanje je bilo sasvim drugačije. Već su se vidjeli i rezultati rada i odricanja kolektiva. 31.12.1967. godine stanje je bilo slijedeće:

Ukupni prihod sa deset zaposlenih iznosio je 82,643.000 starih dinara, vrijednost osnovnih sredstava 22,527.000 starih dinara, a u fondovima je bilo 43,482.000 starih dinara, što je bilo sasvim dovoljno za dalje poslovanje.